

Совхозмудин кӧдлӧчирин таньгъчин хург болв

Октябрь сарин 29-д Элст балгъсна „Родина“ кинотеатрт Халымг таньгъчин совхозмудин директормудин, фермин ахлачирин, эклц парторганизацин сеглӧтрмудин болн кӧдлӧчирин хург болв. Эн хургт 9 сарин эргцд Халымг таньгъчин совхозмудин кесн кӧдлмшин дигин тускар болн цааранднь совхозин мал-гер, эдлаху ясдж батрахин тускар Ставропольск крайин селӧнӧ эдл-ахун управленӧ начальник ур Чеботарев доклад кев.

—Газр эдлгънӧ туст совхозмудин ӧмн ик чинртӧ тӧр тӧвгдджӧнӧ—гидж ур Чеботарев келв.—Халымг таньгъчд 32 совхоз бӧӧнӧ. Тедн таньгъчин теегин 48 процент газр эздж, тӧрӧ-темс тӧрдж, ӧвс хурадж, олна мал ӧсгдж, малас гардг эдл-уш—мах, тос, ус икдӧлдж, орн-нутгтан орулдж ӧгчӧнӧ. Октябрь сарин нег шин кӧртл таньгъчар ма-

лин ӧслтин зура иигдж кӧцв: бод малар—109 процент, хӧӧгъӧр—103 процент, тер дотр нӧӧдир хӧӧдӧр 85 процент болн шовугъар—147 процент.

16 совхоз орн-нутгтан олзта-орутагъар кӧдлджӧхлӧ, 16 совхоз муугъар, ик дугу-дунд узулдж кӧдлджӧнӧ. „Черноземельский“ совхоз, эн джил хӧн болгънас 7,6 килограмм ноос авб, увлд белдвр сӧӧнӧр кев. Ӧнӧгрси джил орн-нутгтан 2 сай арслнӧ ору ӧглӧ, эн джил 3 сай шаху арслнӧ ӧгчӧнӧ. Совхоз „Сарпа“, 107-ч, хойрдгч, дӧрвдгч болн нань чигн кесг совхозмуд болгън 1-2 сай арслнӧга ору ӧгч кӧдлджӧцхӧнӧ.

Эн хургт 15 кӧн босдж ур келцхӧв. Эдн дунд ур Батырев—„Ергенинский“ совхозин директор, ур Киселев—4-ч совхозин директор, ур Салыков—„Западный“ совхозин эклц парторганизацин сеглӧтр, ур

Ташнинов — „Черноземельский“ совхозин эклц парторганизацин сеглӧтр, Соколович—таньгъчин селӧнӧ эдлахун управленӧ ах тооч, ур Василенко—105-ч номертӧ совхозин директор, ур Джимбинов Бембя—КПСС-н Халымг таньгъчин комитетин сеглӧтр, ур Жезлов—КПСС-н Халымг таньгъчин комитетин сеглӧтр, ур Утнасунов—Халымг таньгъчин кӧцӧгч комитетин ахлач.

Эдн совхозмудин сӧӧнинь, дугу-дундинь темдгдж, хӧӧтндӧн улм сӧӧнӧр кӧдлх хаалгъинь заадж, дугу-дундан даругъас чиклдж, Алдр Октябрск социалистическ революцин 40-ч джилӧ ӧӧниг узмджтӧ, ургӧрлм кӧдлмшӧр тосхмн гидж дуудцхав.